

四庫全書

集部

欽定四庫全書

集部

文苑英華卷五百九十五至
七

詳校官給事中_臣李臺

助教_臣常循覆勘

總校官進士_臣朱鈐

校對官中書_臣胡紹基

謄錄監生_臣張元功

欽定四庫全書

文苑英華卷五百九十五

宋

李昉等

編

節朔謝物

宴賜附

謝端午賜物表一首

謝端午賜衣表一首

為田神玉謝端午物表一首

謝端午賜衣及器物等表六首

謝社日賜羊酒等表一首

謝冬至賜羊酒等表一首

謝賜遊曲江宴表一首

謝京城東亭子宴送表一首

三月三日為百官謝賜宴表一首

謝觀內宴表一首

為宰相謝賜永穆公主池亭遊宴表一首

謝賜宴表一首
為楊中丞謝設表一首

代百僚謝許遊宴表一首

為宰相謝內宴表一首

為兩省官謝內宴表一首

謝端午賜物表

李嶠

臣某言中使某至伏奉手詔慰諭并宣口勅賜臣端午衣一副及銀椀百索等兼賜大將衣若干副者天書綢繆聖澤汪濊被服輝煥承恩墮越臣某中謝臣聞日移東井律應南風正陽為納慶之辰長羸表文運之節臣謬膺任使備位守臣撫封而多愧無能望闕而遙思獻壽而陛下恩覃率土寵並勲賢俯因初五之辰遠頒尺

一之詔衣垂纈靡之盛器飾雕刻之珍則辟邪寧假於
赤符蠲癘詎勞於朱索况賜霑禪將化洽方隅仰荷殊
私實慚非據誓將誕敷渥澤保定藩維變淳風於邑里
宣戎政於軍旅俎谿洞安靜波濤不驚伏惟皇明俯照
丹慊臣無任

謝端午賜衣表

臣某言中使某至伏奉手詔慰諭并奉宣聖旨賜臣端
午衣一副銀椀百索等大將衣兩副者王人遠臨天賚

下逮承恩捧詔悸心汗流臣伏以正陽屆節初五授時
萬國獻珍以稱壽九天垂衣而納慶至如靡麗出於王
府頒賜及於方隅蓋所以褒寵有功旌異有德顧臣庸
劣未補涓毫沐日月之齊明與勲賢而並命猥將固陋
之質獲茲器用之深衣降九天懼興刺於鶴翼縷分五
色增長壽於堯年何角黍之足稱豈織繒之為比况賚
及禕將澤被戎行顧茲殊賜實愧非據臣一至湖湘再
周星歲扇皇風而蘇息黎庶布聖澤而底定封疆今井

賦不憊軍旅知訓庶期獷悍之俗獲躋仁壽之域伏惟
鴻造俯察丹誠無任

為田神玉謝端午物表

張說

田神玉大歷中為節度張說開元十
八年卒此表疑邵說代作英華恐誤

臣某言中使某至賜臣母趙國太夫人手詔并衣一副
銀椀一事百索十軸兼賜臣勅書及手詔并衣一副銀
椀一事百索十軸又賜將軍等衣共五副百索共二十
軸者聖慈稠疊感戴無階臣其中謝臣恭守舊規謬知

重務功慙毫髮寵荷丘山蒲篚詔書偏承睿顧傾家服
玩皆自天來叶彼良時旌其益壽淮南藥椀對此殊輕
漢帝露盤方斯匪重索盈千縷衣倍五時雨露恩深不
遺於老母乾坤施廣遍及於下臣受賜若驚銜恩載躍
誓當戮力祇奉威靈縱有百身何階報効臣無任感恩

謝端午賜衣及器物等表 常 袞

臣袞言中使羅希皎至奉宣恩旨賜臣衣二襲金銀器
物十事百索兩軸扇一柄特降王人俯臨私第捧承殊

賚祇荷失圖臣袞誠惶誠恐頓首頓首伏以聖政惟新
方求至理天心所待豈止常才在臣庸愚何足驅使自
受恩宸扆已積三旬尸素廟堂未有能事固宜歸責誠
合避賢聖恩優容寵渥逾厚今屬三疑陽屆節五日御
辰下濟天光曲流睿澤王人班噐司服降衣飾其盤盂
示以金玉王度總其領會一作繪將何以黼藻朝章佩色
絲而表祥捧輕箑而迎暑寵光逾分憂負難勝出自禁
中珍華未覩在於臣下服用敢安旣承飾外之恩彌積

善中之懼無任感戴屏營之至

二

臣某言中使某至奉宣聖旨賜臣衣兩襲金銀器物十
事扇一柄百索兩軸伏以塵辱台司曠廢事任遭逢若
此報効無聞罪譴未知已荷曲成之施庸愚不逮恐傷
則哲之明所以極冒宸嚴懇祈罷黜中慈未允外責彌
深徘徊渥恩覲愧朝列四時之錫累沐寵私五日之慶
又蒙榮賚衣服器用特降珍華疵賤凡微曷堪光飾况

師旅在外疆界未寧日費千金篋無半菽今有功之士
賞或未周無益之官一作臣寵之過厚已紆成命不敢上
辭惶赦拜恩實慙虛受無任荷懼之至謹奉謝表以聞

同前

呂頌

臣某言中使至伏奉詔書并賜臣衣一副金花銀椀二
枚百索一軸大將衣兩副大明生東無遠不照時雨潤
物有形必需臣某中謝伏以朱明屆節端午良辰寶歷
叶於重離聖壽齊於兩曜臣凡愚賤質草木微軀謬居

藩鎮之榮獲守黔巫之地豈意聖慈天覆不隔遐荒珍
物出於九重麗服延於萬品臣與將校等雖備戎旅素
乏勲庸當蠻徼廓清之時霑普恩頒賚之慶榮分閭外
喜溢行間仰戴殊私罔知所報不勝忭躍之至

同前

權德輿

臣某言中使陳忠玠至伏奉

集作
准

前月十七日手詔賜

臣端午衣一副銀椀二隻銀鈔羅二

集作
砂羅

百索一軸并

大將衣服等慶賜遠降天顏如臨恩光綢繆器服輝麗

成周士吏居守輿師喜氣歡聲以感以抃臣某誠欣誠
荷頓首頓首伏以斗杓建午之初日永星火之際陰陽
慶接天地氣交陛下法象乾坤順行時令賀獻本臣子
之志寵賚延君上之恩孱微無庸跼蹐斯甚佩長命之
縷俾壽而臧捧在筥之衣既安且吉然後大敷渥澤盡
感鴻私顧已難酬此生何幸無任荷戴踴躍之至謹附
中使陳忠玠奉表陳謝以聞臣誠歡誠抃頓首頓首謹

言

同前

劉禹錫

臣某言中使劉元弼至奉宣聖旨慰勞臣及將佐官吏

僧道耆老

集作壽

百姓等兼賜臣墨詔并衣一副金花器

三事絲索

集作絲

一軸大將衣四副綵絲五軸籠光荐至

慶賜曲霑抃舞失容捧戴無力臣某中謝伏以朱明仲

月端午佳辰萬國被薰風之和九天垂湛露之澤臣幸

逢休運獲守外藩叨承睿慈猥霑

集作受

榮賚發詔而煥

窺宸翰

集作象

振衣而頓失炎威色絲表祥載光於佩服

珍器充玩盡飾於圓方恩輝既盈喜懼交集下延裨將
共荷鴻私

二

臣某言德音曲被喜溢羣情厚賜遐頒榮霑陋質臣某
中謝伏以蕤賓在律端午御辰慶列丹墀守藩莫及恩
隨綵縷捧軸難勝况衣極珍纖涼生温暑器皆照爛光
發戶庭竊慙彼已之詩敢忘滿盈之誠惟當蒞戎有勇
訓俗知方永懷銘縷之誠冀申赴蹈之節臣與大將無

任感戴踴躍之至

謝社日賜羊酒等表

常 袞

臣某言內常侍王子昇至宣奉聖旨以社日賜臣羊酒
脯腊海味油麵粳米等仍特賜藥飲者喜抃失容兢慙
無措臣誠惶誠悚頓首頓首臣叨踐台階已速官謗聖
慈矜宥殊貸曲全猶使省近掖之文重高門之地白骨
再起飛魂復還感恩若驚雖死何答伏以宰輔之任燮
和所關自頃憊陽向逾累月近方降雨今復周旬致令

水旱不時陰陽失序若令歸責臣亦何逃故事昭然所
宜黜免且勾龍立社祀典攸書大稷主農國章斯在以
享田祖以報秋成今穎實未登梁盛乖望是君積憂之
日是臣獲戾之時豈望慶自雲天曲容酒食之宴恩霑
疵賤下及膏粱之珍醉樂空比於堯人宰乎實慙於漢
相無功受賜有覩何逃上戴寵私益深惶惕無任忭躍
屏營之至

謝冬至賜羊酒等表

臣某言中使某至奉宣恩旨以至節賜臣米麵羊酒猪鹿雜味等伏以非才曠官微臣之愧耻待寬責薄聖造之矜容貸罪則多負恩已甚進思無補退復何顏以周官之職且乖於水旱而漢臣之賜空積於歲時屬北陸涸陰南郊迎日古今良節朝野同休天慈過深榮賚逾厚王人結駟膳宰駟輜特減內庖之珍遍賜遠方之異光華里用充溢門閭臣本布衣列於賤品千年遇聖忽至層霄萬死酬恩豈裨大化素甘藜糗既飽於梁肉多

乏濁醪既醉於醇酎荐沐非常之寵不知所忝之由少
長對筵悲歡相慶何功而至此何力以任之捧戴若驚
慚惶交集無任

同前

臣某言中使某至奉宣恩命以至節賜臣者聖旨頻降
榮賚過優以周官百品之珍載頒其實雖魏臣五熟之
釜豈容其多受賜踰涯拜恩失次臣出自孤微素常貧
苦食不滿腹竊誠脩身且祭不拚豆飯惟脫粟昔賢之

美其儉可師敢望豐盈重彰尸曠而雨露偏施歲時益
榮俾奉先之饗味兼陸海合族之宴甘及膏粱又沐深
慈下霑中饋以感以慶啓處難勝無德無功慙惶罔極

云

云

謝賜遊曲江宴表

李邕

臣邕等言臣聞昔時人君之德也大撫萬國必親諸侯
是以通下情序賓禮伏惟陛下因遇上已收接下臣順
發生之時宏在鎬之宴仙厨和鼎泆洽於廣筵舜瑟一作

樂歌風均調於曲水士女車騎充溢山川林薄光華纒連城闕臣等撫躬何幸報德無階空慙尸素之名豈適輪轅之用不任戴荷忤躍之至謹詣朝堂奉表以聞

謝京城東亭子宴送表

張說

臣某言力士至奉宣勅以臣臨岐特令賜宴恭承惠渥念及庸微天地同仁木石知感不勝惶悚戴荷之極臣其中謝臣歷觀自古君臣凡所際會或因緣黨進或延接功成故未竭而知不言而信豈有地孤援寡毀衆謗

深察蒙蔽之中致曠蕩之外逢陛下特達之過當陛下
聖明之朝事出非常澤均恩重今者誓將瀝血未足竭
誠徒欲殺身豈能報德至如勵精勤政與直守公酬陛
下憂人之心行陛下宏道之化安敢失墜以負神明但
函關路遙長安日遠不任戀主悽愴之至

三月三日為百官謝賜宴表 宋 璟

臣某言臣伏以漢崇元巳齊曰上遊咸聞執蘭以盛禊
飲洛水之會囂呼不足紀也永和之遊僻陋不足追也

臣等生逢多幸遇會聖明賜與榮渥逾溢涯分詢於史策超軼古今臣某中謝伏惟皇帝陛下屈已愛人布和施恩慶賞所及萬國歡心財成之道與天悠久爰以令

節錫宴公亭萃

集作翠

帝文茵俱來天上嘉餽清醕亦自

大官欣歡之聲泱於億兆銜感之至形於頌歌而天心霈然宸章煥發曲蒙賜示捧讀兢懼涵泳五音光輝二雅流於管磬永播無窮豈臣庸愚詎能思度今狂虜衰息年穀屢登俗被湛恩人歸壽域讌遊高會適助時康

况上宰家卿脩簪長劍前後羅列小大相從所以序聖
朝之多士為百代之風流臣等叨榮無任懇迫報効何
日進退知慚不勝欣抃之至

謝觀內宴表

臣某等言伏以雲韶是稱天樂華夷不覩庶品徒瞻伏
惟皇帝陛下慶浹人神惠敷雲雨合飲於八仙伎降於
九重遂使六樂增唱萬人駭嘆豈激楚之足匹何鈞天
之能擬况復飾無貨寶衣用大帛遠而望之如金翠之

旅近而觀之同弋緝而髣其廣大也可以俗應陽和其
純儉也可以人知軌物故能作程海內垂裕天長望編
史冊永彰明聖臣等不勝悅豫之至

為宰相謝賜永穆公主池亭遊宴表

孫逖

臣某言內使趙侃奉宣恩旨賜臣等明日於永穆公主
池亭遊宴者謬承天澤頻賜春遊小人之腹每辱於珍
膳下里之聽屢聞於仙樂殊私荐及榮施難酬雖朝野

多歡實樂太平之運而消埃莫効彌慙非擬之恩無任
悚灼之至謹奉表陳謝以聞

謝賜宴表

常袞

臣某言臣一昨特荷聖慈曲承寵會今日又奉進旨臣
兄太常丞臣某亦霑內宴仍賜錦綵百疋衣一襲并銀
器等非擬之任已忝股肱曲承之恩更及骨肉仰天增
愧何地有安臣其中謝臣聞禮之制也以飲食親宗族
詩之義也以愷樂宴嘉賓以通上下之情以展君臣之

義將以裨於風化故無謬於寵私伏惟陛下稽古以理
宗儒之教示其恭儉之訓溥頒雨露之恩叶時布和式
崇饗宴至於需以酒食昭其慈惠必先宗戚次及舊勲
臣出於孤賤又乏功勞無所克堪豈宜齒列臣兄何幸
又沐殊榮寵極膳羞之珍禮優筐篚之至合生成於同
氣聚慶賀於私庭昔人獨咏於鹿鳴在臣蕪輝於鴈序
手足無措揣分空慙形影相顧捐軀何答臣無任

為楊中丞

某作
湖南

謝設表

柳宗元

臣某言中使某乙至奉宣聖旨賜臣長樂驛設者恩榮
特殊宴飲斯及顧茲厚禮猥集微躬臣某誠懼誠慶頓
首頓首臣以多幸屬此昌時任重方隅職忝文武甘受
素食之刺知無肉食之謀以憂以惶寢寐無措豈謂鴻
私繼至豐膳爰來陸海兼陳酒集作醴集作皆設庶當奉揚
聖澤覃布遠人流愷樂於皇風均乳哺於赤子少陳微
効上答殊私無任感恩抃集作躍之至

代百僚謝許遊宴表

呂 温

臣某等言今月二十三日宰臣奉宣進旨

集作止

如聞百

察士庶等親友追遊公私宴集及晝日出城餞送每慮
奏報自今已後各暢所懷者志存必信義切同休令行
如春神應若響寒木暉潤嚴風變和推已感於人心發
生先於天意臣某中謝臣聞與人同其樂者不必盡致
於韶夏之庭在夫不奪其歡而已與物致於集作其誠者
不必日効於丹青之信在夫不察其細而已况乎縉紳
之樂名教聚皆以類臣子之事君父遊必有方豈足輕

聳物情遽塵天聽伏惟皇帝陛下光纂十聖威臨萬方

集作國

神武功就人文化成窮溟無波豐歲將宴

集作晏

樂

奏穆清感深乎共樂之道駕言遊幸思所以適人之方

爰詔輔臣式將明命優諭卿士達於庶人琴筑追遊無

憚京輦

集作輦

輜輶送遠勿限嚴城禁吏司之苛察盡朝

野之歡泰始覺飛沉之樂宇宙之寬物不自疑人知所

措

集作符所

在宗載考夜飲承湛露之恩求友相鳴時宴奉

祥

集作需

雲之慶泱休聲於夷夏蒸喜氣於山川千載之

昌運允符百王之遺美斯舉臣等謬膺寄任親奉休明
方感生成之德更蒙優貸之詔恭承睿旨務竭歡心飽
思屬厭醉念溫克戒竹林之虛誕去金谷之浮華君雖
不察於泉魚臣敢有愧於屋漏承歡且懼居寵彌驚稽
首知慚殺身何報無任感恩兢惕之至

為宰相謝內宴表

錢珣

臣某言臣聞古之王道美在詩人爰徵式宴之名則有
鹿鳴之什俎豆既列筐篚亦陳羣臣享而受之得使盡

其心也能追古道實在哲王臣其中謝伏惟尊號皇帝
陛下聖文有作臨照克明昨者以告見祖宗率兩宮而
偕行重典祈禱天地感百神而已報豐年方屬清和更
宏慈惠遂當暇日乃闢廣場既接輔臣兼延卿士我心
則悅洞開咫尺之顏不醉無歸畢降獻酬之禮而又深
形睿旨新製樂章但臣等忠則有思拙而無補陛下勉
其翼戴播在絃歌竊聽鏗鏘空知慚感為思如此何力
可勝徒以宮殿飾同疑文符混一舞成竒字更俟太平

待季子之請觀笑吳宮之教戰盡如解愠詎異聞韶况
凡有嘉邊親令下筋巨細之事指顧不違鴻私曲被於
茲辰寵遇頗踰於往列仍蒙賜賚且極纖華伏自侍宴
已來還家自省燮理欲酬於玄造終乏嘉謨傳聞空徧
於遠方彌光聖德君臣共樂史冊可書臣某等無任銜
恩涕感歡榮忭躍之至

為兩省官謝內宴表

臣某等言臣聞謂傾心於百辟向日雖同觀拱極於衆

星在天各遠所以會朝之地每隔丹墀而燕私之嘉忽
親黼扆注渥恩而則可求故實以未聞事出常倫感深
庶位臣某等伏以考擊鍾鼓鋪陳几席恭惟列聖常命
周行且屬宴安仍湏物用匪勞規畫始就歡娛今陛下
以尚念多難不為自逸外開貢輸之數內無饒羨之資
蓋以臨昧旦而謁宗祧彛章必具仰昊天而祈稼穡甘
澤已頻方當行慶之時且欲與人同樂昨者昭垂睿睠
俯接羣僚忘憂而飲備六清既飽而羞踰百品戒膳夫

之失飪詔酒正以如澠賜者鮮闕行之皆徧飾喜則聲
從禹律製曲則音自充聰樂和而鳳鳥應來舞妙而薰
風共轉曲形文字全為生靈承天詔以咸觀兼聞金石
泛恩波而已醉不待罇壘栢梁殿唯召詞臣華林園亦
非密座共當異寵難並茲辰光東帶而更勵立朝顧綵
繒而彌慚勝質則微臣非徒享滋味聽鏗鏘而已霑纓
感德稽首拜章臣某等無任荷恩激切榮躍屏營之至
謹奉表陳謝以聞

文苑英華



文苑英華

十八

文苑英華卷五百九十五

欽定四庫全書

文苑英華卷五百九十六 宋 李昉等 編

節朔謝物二

謝臘日賜臘脂口脂表一首

謝賜香藥面脂表一首

謝賜新曆日及口脂面藥等表一首

謝墨詔賜曆日口脂表一首

為郭令公謝臘日賜香藥表一首

為郭令公出上都赴奉天行營勅賜錦戰袍并口

脂等謝表一首

謝勅書賜臘日口脂等表十四首

謝停賜口脂臘脂表一首

謝賜鍾馗及厯日表三首

謝臘日賜臘脂口脂表

李嶠

臣某等言品官劉阿道至奉墨勅賜臣等臘脂口脂等物恩命忽臨喜抃交至手舞足蹈心慚意悚伏以安寧

戒序嘉平在節白日臨於陽谷繁霜入於露寒蘅株始

停

疑

桂筵豐暇青牛帳裏未輟鑪香朱鳥窓前新調鉛

粉因三冬之吉慶造六宮之脂澤糝之以辛夷甲煎燃
之以桂火蘭蘇氣溢象奩香衝翠幄以光金屋之仙鄉
以賜瑤房之帝嬪南國容華之人從來未識西京妖冶
之妾何時可見臣等叨膺天命謬揔留臺雖天動星迴
璽違於侍從而雲行雨施更延於恩渥猥承郵驛曲賜
繚綸分八子之膏腴及三臣之瑣賤竊窺明鏡已覺衣

冠之不任旋顧粧奩遂成箕箒之多幸身輕塵露佩德
空深貺等丘山殞身何答無任踴躍屏營之至

謝賜香藥面脂表

張九齡

臣某言甚至宣勅旨賜臣裛衣香面脂及小通中散等
藥捧日月之光寒移雪海沫雲雨之澤春入花門雕奩
忽開珠囊暫解蘭薰異氣玉潤凝脂藥自天來不假淮
王之術香宜風度如傳荀令之衣臣才謝中人位叅上
將疆場効淺山嶽恩深唯因受遇之多轉覺輕生之速

臣無任

謝賜新歷日及口脂面藥等表

邵

說英華作
張說非

臣某言中使某至伏奉某月日墨詔賜臣新歷日一通并口脂面藥紅雪紫雪等窮漠之上寵詔忽臨大蜡之辰慶賜爰及跪承慈渥戰汗失容臣往塵近掖實曠天心洎守遐藩多昧戎畧殊私未答官謗將營陛下聖德包荒宸嚴曲貸猶存寵任便泱恩波覆燾不遺於遐陬賜賚亟霑於尸素况日官頒歷承敬授之規綸旨宣慈

沐逾涯之獎蘭膏滋潤絳雪珍芳捧持而炎瘴自消潤
飾而衰容坐變丘山非重草芥至微雖百其身豈酬鴻
造無任感恩瞻戀之至

謝墨詔賜厯日口脂表

臣某言伏奉月日墨詔等恩波遠被寵賜存臨捧持傾
心跼蹐無據臣某中謝臣分麾五嶺謬竊殊榮蒞鎮三
年竟無微効陛下不遺舊齒猶獎非才恩禮決於遐藩
慶賜覃於令節天心宏覆慈旨優醲頒聖厯以授時降

寵恩而撫俗薰風溥抃陽景照臨輝華遍於草木抃舞
盈於路衢蘭膏絳雪冰雨露之湛恩陋質凡姿荷乾坤
之厚施伏以三元在近國度維新百辟獻芹獨馳心而
望闕二毛垂領唯懇願以朝天犬馬微誠感戀逾切無
任感恩戀主屏營之至

為郭令公謝臘日賜香藥表

臣某言月日中使某至伏奉恩旨勅賜臣臘日香藥金
花銀合子兩枚一作面脂一合裏香二袋澡豆一袋者

開奩氣馥拜蹈增慚臣中謝伏以時當大蜡節號嘉平
歡已洽於人神賜仍周於黻冕沐茲芳澤傳以香蘇忖
陋體而何幸顧頽齡而可駐丘山施重雨露恩深感戴
慙惶不知所報無任荷恩稠疊之至

為郭令公出上都赴奉天行營勅賜錦戰袍并

口脂等謝表

王 諫

臣某言臣今日巳時至臨臯驛西開府魚朝恩見奉宣
進止賜臣錦戰袍等又未時至管城驛縣中使至賜臣

瓜兩顆聖慈荐及寵賜頻加榮有同於衣錦恩乃及於
挾纊重裘莫比被練非堅以此臨戎期於盡敵况傳之
香澤分以甘瓜推食揀衣未足為喻誓當畢命少答殊
私身膏草野實伸至願無任受恩稠疊之至

謝勅書賜臘日口脂等表

呂頌

臣某言中使某至伏奉勅書手詔并賜臣厯日藥物及
銀合等千年聖厯忽降遐荒萬里天書更臨下土臣某
中謝臣駕駘賤質草木微生謬荷國恩擢居方鎮按俗

闕澄清之任臨戎無毫髮之功累授殊私荐霑芳澤况
靈長上藥列在仙方芬馥蘭膏出於中禁豈臣庸陋宜
此寵榮感戴天恩不勝抃躍

同前

臣某言中使某至奉宣聖旨賜臣膈日香樂口脂等宸
私曲被殊賜荐加祇奉恩榮荷戴惶灼臣中謝陛下德
施周普蠟百神而魚蟲不遺慈澤旁流錫羣下而細微
皆及謬承良藥之貺豈當同體之榮龜首疑作手既沐其

芳馨香膏又霑於脣吻賁飾之道備幸於臣澤泱肌膚
恩深骸骨撫心揣分慙厚施於天休賤質庸陋荷曲誠
於玄造實為僥倖何以克堪涓埃無補於綱維濡渥有
加於蓬賤丘山惠重螻蟻命輕覲厚顏於一作以死生覬
忘軀而徇節臣無任

同前

臣某言中使某至伏奉宣賜臣紅雪口脂各一合降自
重霄賚于賤品承旨慶抃省躬慙惶臣某中謝臣謬處

準繩遂更律候每慙効薄常懼食浮豈謂特迓鴻私猥
霑殊賜時當蜡臘澤泱幽微彩雪蠲邪無虞於美疚芳
膏盡飾有愧於陋容徒罄丹誠不知上答無任感戴之
至

同前

臣某言中使某至伏奉勅書慰諭并宣進止賜臣紅雪
紫雪口脂等慶賜以時寵光逮下捧詔心慄承恩汗流
中謝伏以玄律送寒清霜戒臘九天布惠萬類發生臣

以庸虛謬當任使觀風未久按部無能而陛下俯念守
臣恩同勲舊詔垂御札藥稟仙方降蘭澤以傳馨頌玉
歷以示慶實慙固陋忽被光輝撫躬循已終夕愧厲謹
當調整師旅收養黎甦敷雨露之恩宣日月之照俾瘡
痍漸復江湖安流庶於涓毫上答山岳伏惟皇鑒俯照
丹誠無任

同前

常袞

臣某言內侍蒙日新等至奉宣恩命賜臣面脂口脂香

藥澡豆并銀餅子等伏以受任以來殊私未答每更節
候慙曠歲時屬玄律送寒清霜戒臘陛下爰脩大蜡用
告順成既息田夫復祭先嗇臣以涓埃莫効冰炭相仍
年穀未登人財益匱致滋不稔之咎實媿報農之辰兢
惶失圖啓處無地聖慈全宥寵錫過優珍噐鮮華蘭膏
芳潤以疵賤之質忽降御香以覲冒之容忽澡天澤省
躬無措跪奉何施粉骨酬恩未伸萬一無任感戴欣懼
之至謹奉表陳謝以聞

同前

臣某言中使某至伏奉某月日勅書并手詔勞勉臣等
兼賜臣衣一副臘日口脂紅雪一合中和尺一貞元八
年厯日一通陛下道邁古先德動天地凡於一物必寄
聖慈欲臣襦暖悍嫠故衣裳是賜欲臣除去人患故良
藥下霑欲臣永駐衰容故馨香流潤新厯方啓慶昌運
之無窮彛尺辨才審度量之不昧力微賜重捧戴兢惶
臣無任

同前

臣某言中使郭昕至伏奉手詔并賜臘日口脂紅雪貞元九年歷日等拜受怔營不知所措臣某中謝伏以玉散降於仙宮金膏流於秘藏含芳咀味覺六府之和潤骨凝膚改三年之觀况復惟新聖歷受朔齊人稱慶戴恩倍萬恒品不勝踴躍之至

同前

臣某言中使吳千金至伏奉十一月九日賜勅書手詔

存問臣及將吏百姓等自天渙汗徧施稚孺普及纖細
歡呼未暇聖念再加老幼捧恩感動肌骨又以臘日將
及賜臣紅雪口脂各一合貞元十五年曆日一通跪啓
緘封榮抃相集伏以方傳上仙藥成中禁却老除患妙
絕如神嘗所聞知豈期親授况階冀候朔晷度不差蒲
柳微生又膺天厯恩波逾重跼蹐難勝不任感恩荷聖
踴躍之至

同前

李舟

臣某言今日中使內府承張某至伏奉勅書賜臣及
軍將膈日面脂香袋紅雪澡豆等殊私忽臨捧戴無力
手足蹈舞神魂若驚臣某中謝伏惟陛下以節遇嘉平
律當凝閉爰布發生之德猥承頒賜之榮膏液廣霑降
中天之渥澤生香遠及蘊西域之芳馨苦口以愈沉疴
澡身以滌塵垢無任感戴屏營之至

同前

臣某言中使至伏奉勅書手詔賜臣新曆日一本口脂

面脂紅雪紫雪金花各一枝并賜臣春衣一副牙尺一
枚大將衣兩副宸翰忽臨殊賜兼及蠻夷捧詔拚躍輕
生將吏受恩誓心効死臣其中謝伏以令節嘉平曲承
寵賚凝膏芳潤獲滋蒲柳之容寶器珍竒遠承日月之
照謬當重寄星歲屢移恩積丘山功無毫髮况玄陰云
暮斗柄初迴已霑芳澤之恩兼降中和之服頒賜尺於
王度布新厯於荒陬躍抃徘徊莫知所報臣無任

同前

韓翃

臣某言中使某至伏奉勅書宣慰臣及將士等并賜臣
母中國太夫人口脂一合面脂一合澡豆一貼并賜臣
温香一合蕙賜將士口脂等聖慈稠疊感戴無階臣某
中謝臣絳髮効微乾坤施重因時受賜覩物知恩寵及
澡身榮加潤色恭嘗御藥心則和平新受國香人其服
媚飾犬羊之賤質齊鴛鷺之增慶恩必及於慈親澤兼
流於宿將感戴洪恩無任抃躍屏營之至

同前

劉禹錫

臣某言今日中使某官至奉宣詔書賜臣及將士臘日
口脂香藥紅雪等自天有命踏地無容虛受寵光翻成
憂負臣某中謝臣位居方鎮才實凡庸郡邑臨人未移
風於弊俗歲時頒物空竊賜於聖明特降璽書重加靈
藥潤之膏液襲以蘭芳期美疢以蠲除冀頰頰而可駐
殊私不遺於一物曲澤下及於三軍未報主恩慙於犬
馬唯將臣節死於封疆無任

同前

臣某言中使霍子璘至奉宣聖旨存問臣及將士官吏

僧道耆壽百姓等兼賜臣墨詔及貞元十七年新曆一

軸臘日面脂口脂紅雪紫雪并金花銀合二金梭合二

皇明遠燭殊集作思錫荐臻抃舞失容捧戴無措臣某中

謝伏惟皇帝陛下立極御人順時布政禮崇大蜡澤浹

遐藩臣叨榮日深竊位時久謬迴宸睠猥降王人天書

下臨覩三光之照耀玉厯爰授知四氣之環周雕奩既

開珍藥斯見膏凝雪瑩含液騰芳頓光蒲柳之容永去

癘疢之患命輕恩重上答何階無任屏營之至

同前

令狐楚

臣某言去年十二月中使至奉宣勅書手詔兼賜臣口
脂紅雪各一合十年曆日一通捧緘跪發以喜以駭臣
其中謝臣聞平分四時充有曆象聚蓄百樂周之憲章
至若雪散擁紅紫之名香膏蘊蘭薰之氣合自金鼎貯
於雕奩是宜寵錫大臣榮加有德用灑非常之澤式彰
不次之恩而臣遠守崩隅賤同凡器曾無薄技上答殊

私陛下惠與雲行德如天覆發於中禁及此下藩諭以
綸綍之言頒其啓閉之節脂膏一潤覺面目之有功藥
石載攻知肺腑之去疾誓當延年聖代戮力清朝戴昊
天而不勝瞻魏闕而增戀臣無任

謝停賜口脂臘脂表

權德輿

臣某言伏奉今月十七日手詔以諸道每年合送口脂
集作及尺既非厚賜未足伸恩以方鎮勞煩道路為敝

一例停罷貴適便宜以示臣者恩自九天澤同
集作萬

周

宇伏讀詔旨仰荷皇明臣某誠懽誠喜頓首頓首臣聞
務其大者捨其細存其廣者遺其狹故先師有寧儉之
教禮經有必簡之文陛下誠切愛人志於求瘼口臘香
澤豈均雨露之濡尺寸度數曷比乾坤之大以道途勞
費傳置將迎鑒在事先慮周物表去煩就省約已使人
合簡易於二儀燭休明於四裔臣謬居分土獲奉德音
集作音抃賀之誠倍萬恒品無任感戴悅懽之至謹奉表
陳謝以聞臣某誠懽誠喜頓首頓首謹言

謝賜鍾馗及歷日表

張說

臣某言中使至奉宣聖旨賜畫鍾馗一及新歷日一軸者猥降王人俯臨私室榮鍾睿澤寵被恩輝臣其中謝伏以星紀迴天陽和應律萬國仰惟新之慶九霄垂湛露之恩爰及下臣亦承殊賜屏祛羣厲續神象以無邪允授人時頒歷日而敬授臣性惟愚懦才與職乖特蒙聖慈委以信任既負叨榮之責亦懷非據之憂積愧心顏難勝惕厲豈謂光迴蓬華念等勲賢慶賜之榮賤微

常及感深犬馬戴重丘山無任

同前

劉禹錫

臣某言中使某至奉宣聖旨賜臣畫鍾馗一新曆日一
軸恩降雲霄光生里巷雖當歲暮如煦陽和臣某中謝
伏以將慶新年聿脩集作循故事續其神象表去厲之方
頒以歷書敬授時之始微臣何幸天意不遺

同前

臣某言高品某至奉宣聖旨賜臣畫鍾馗一新曆日一

軸星紀方迴雖逢歲盡恩輝忽降已覺春來伏以圖寫
威神驅除羣厲頒行律曆敬投四時施張有嚴既增門
戶之貴動用叶吉常為掌握之珍瞻仰披尋皆知聖澤
無任欣戴之至

文苑英華卷五百九十六

欽定四庫全書

文苑英華卷五百九十七 宋 李昉等 編

謝追贈官喪葬

此卷英華所編失年代先後今正之

謝贈官表一首

為寧王謝亡兄贈太子太師表一首

謝贈亡妻鄭國夫人表一首

謝贈姊隴西郡夫人表一首

謝賜男絹等物并贈亡妻晉國夫人表一首

謝追賜父母官表四首

代韋令公謝先人贈官表一首

代路中丞謝先人贈官表一首

為杜司徒謝追贈表一首

代兵部崔相公謝追贈三代表二首

為宗舍人謝賻贈表一首

初七謝恩表一首
遷祔謝恩表一首

為義興公求拜掃表一首

為義興公陳請終喪表二首

為田僕射薨謝制使問表一道

為田神玉謝賜錢供兄葬表一首

為田神玉母太夫人謝男神功葬賜錢及神玉領

節度表一首

為田神玉謝兄神功於京兆府界擇葬地表一首

為田神玉論

疑作謝

不許赴上都護喪表一首

為田神玉謝詔葬兄神功畢表一首

謝贈官表

常 袞

臣袞言伏奉今日恩命臣亡祖故慶王

宰相世系表作雍王文學

先臣楚珪贈兵部尚書亡祖母王氏贈齊國夫人亡父

故京兆府三原縣丞贈給事中先臣無為贈太子太保

亡母南陽縣太君張氏贈鄧國夫人仍賜立私廟三室

慈旨忽臨憫冊加等哀榮頓極感涕交流今日殺身此

生分足臣袞中謝臣聞德及於人功濟於物然有光昭

祖考特加追命之榮崇嚴廟室俾展奉先之敬臣授任

非據尸位已淹合上叩公朝退身私第固以未禪神化
誓答皇慈尚塵青瑣之闈猶汚玉堂之署乾坤施厚歲
月恩深趨進崇階坐封故郡如臣之比罕見其倫今又
念及先臣旌其內訓寵以六官之長榮極三師之列魚
軒表於東海翟第賦于南都宗柘有儀春秋有祀變其
士祭之禮被其公服之章昭穆偕昇感懷泣血永惟臣
之祖父業茂文儒夙荷重名不躋通列微夫小子寶忝
前人才薄位高上慙無地夙夜感切啓處不寧豈謂寵

靈荐加志願俱畢人子之道聖睿曲成情禮之間私門
獲遂屬當禁火歸省先塋便奉除書以時昭啓洒雨露
於松柏懸日月於丘封閭里相榮故老垂泣不圖存歿
頓極於斯寵渥殊常戴荷失次於家出望於國無勞惶
赧踧躅不知所報無任感慶屏營之至謹奉表陳謝以
聞

為寧王謝亡兄贈太子太師表 元 稹

臣琳言伏奉今月七日制書贈亡兄特進汝陽郡王太

子太師澤下天中寵被哀次昭告且畢推絕失圖臣某
中謝臣自撥咎繫復此悲苦更蒙飾終恩倍盈先遠之
痛無任屏營哽塞之至

謝贈亡妻鄭國夫人表

臣某言某月日中使某至特蒙聖慈追贈妻單氏鄭國
夫人捧拜絲綸載光寵宥臣某中謝臣亡妻所生男憑
見任御史中丞克張孝忠軍職務臣頃應援易定之日
屬京師變亂之初臣方誓死迴軍星言赴難孝忠敵強

勢弱切欲相留稍住則臣子不安往來則懷撫交闕男
憑年甚幼小留定婚姻恭行廟勝之謀克覩中興之運
憑雖昧推似可憂矜陛下猥賜寵章贈延聖善因子及
母恭承孝理之風念往慰存為屈哀榮之典既申翟弟
追詠鵲巢恩光既洽於幽明霈澤永流於泉壤憑緣所
職久在定州殊私豈止於邱山感激實深於內外臣無
任

謝贈姊隴西郡夫人表

臣某言伏奉詔命贈王氏之姊隴西郡夫人恩澤送終
寵賁中錫感戴無力幽冥有光臣某中謝臣少遭閔凶
長姊覆育中限王事動成遠辭奉迎纔至殂謝已及臣
頃者近當劇賊遠候蕃戎方勤公家遂殺一作私禮瞻

言痛慕有踰常品豈意詔書下降聖澤旁流念微臣之

瑣功封及其

一作亡

姊迴聖代之茂典榮彼重泉未知何

階仰答殊造庶將友愛之分用酬愷悌之恩臣無任

謝賜男綰等物并贈亡妻晉國夫人表

代人作

令狐楚

臣某言臣特進奏官狀報三月二十五日本道監軍李
輔光奉宣進止賜臣男公敏絹五十疋衣一副著蓋椀
一并合發遣往東都辦護喪事至二十六日伏奉勅賜
臣妻博陵郡夫人崔氏晉國夫人欽承明命以悲以歡
臣某中謝臣某帝枝末屬天壤微生幸偶升平叨居要
劇生成之德無以奉於君親封賞之榮豈望及於妻子
今者一門之內二日之中王澤浹於幽門天光蟠於高

下受恩過厚，忍愧逾深。且剪葉為珪，晉封所以稱其大；織縑如雪，班女由是詠其妍。既耀溢於親踈，實感纏於存沒。未知所答，難以自陳。空知想泉路以傷心，仰天衢而稽首。所守有限，未獲陳謝。無任

謝追贈父官表

韓 翊

臣某言：伏奉恩制，追贈臣亡父通直郎、行京兆府醴泉縣尉、成名禮部郎中者。溼澤流於幽隧，哀榮集於私門。兢惶拜命，涕咽無措。臣其中謝先臣素履，貞白早謝。昌

時臣雖叨竊班榮不及祿養每懷風樹之痛莫報蓼莪之恩伏惟皇帝陛下深一作源宏孝理澤被存沒特降殊私爰加褒贈幽靈知感結草有期微臣戴恩畢命思報不任荷懼懇悃之至

謝贈母官表

臣某言伏奉詔書追贈臣亡母李氏楚國太夫人者承命祇感哀榮罔極臣某中謝臣年甫強仕禍積靡恃痛吹棘之莫諭瞻風樹以求懷雖忝分茅之榮實由斷織

之訓動興怵惕感戴劬勞豈謂陛下推恩成仁廣孝致
理寵延隴隧秋開國封使微臣沒地有辭終天無恨既
申欲報之志更切匪躬之誠餘生萬死豈答玄造無任
受恩屏營哀感之至

謝追贈父表

臣某言伏奉詔書追贈臣亡父先臣司空者慶因出震
澤及重泉禮命式加哀榮兼極臣某中謝臣遭家不造
過庭無聞仰先聲而彌高勤遺訓而靡及徒因積善率

勵小心位忝統戎寵加錫賞此誠陛下孝理為本德教所先因作解之明威布追遠之厚德禮降幽壤位崇上公遂使展罔極之哀受恩感於庶物曩有後之慶撫事愧於揚名既申報養之懷載竭移忠之孝臣子誠願備極於斯無任哀感之至

謝追贈父母官表

權德輿

臣德輿言伏奉今日恩制臣亡父贈太子少傅先臣某追贈太子太保寵靈所及徽數特加捧承命書感奉酸

咽臣某誠惶誠荷頓首頓首伏以先臣在天寶末年筮
仕幽朔艱貞特立忠孝兩全名節冠於古今風聲激乎
天下以執憲載筆逮事肅宗稟命不融早達昭代臣齟
齬之歲孤苦零丁遭逢昌運漸履名級過叨睿獎忽至
台司無能受祿莫與臣比以先臣之名器未稱餘慶或
鍾蒙陛下之寵秩逾涯此生何幸所建家廟實稽國章
時及春祀禮從祔饗豈謂聖慈曲被孝理集作思是崇當
啓匱題主之時有告第漏泉之命感悲集作深霜露禮盛

蒸嘗自葉流根寔荷非常之澤摩頂至踵難酬不次之

恩交感之情

集作幽明交感

山岳非重無任祇荷隕越之至謹

奉表陳謝以聞臣某誠惶誠荷頓首頓首謹言

元和七年二月

一
日

代韋令公謝先人贈官表

臣某言伏蒙天恩贈臣父尚書右丞司農卿先臣某揚州大都督禮極哀榮感戴增懼臣某中謝臣父受教儒門宣力王室雖典司網轄而未及崇班臣殃咎所鍾早

失嚴蔭恭守遺訓致及人倫建事休明謬登清貫常恐
不克負荷忝辱祖宗豈謂陽和之仁因下炎上雨露之
澤自葉流根大府名藩位秩崇重授之庶姓罕有其倫
是臣父著績於先朝蒙寵於今日臣事君之節未効涓
塵為子之方已榮松楸感恩思報豈謂為忠覆族殞身
孰云非孝方任有限拜謝無由徬徨海隅進退哀懼不
任荷恩之至

代路中丞謝先人贈官表

臣某言伏奉某月日恩制追贈亡父先臣某司空積感
昭靈肅膺嘉命捧戴綸旨哀號靡及追榮袞章沒世無
覩先臣某策名昌運不待聖明錄功上台載彰忠烈陛
下以臣兄應治行有聞擢居連率光賁重溼慶流三泉
此皆陛下代天永錫論道成於故事俾臣兄弟私疑作
移
孝歸於盡忠悲喜交心拜舞以泣不勝感咽崩摧之至

為杜司徒謝追贈表

劉禹錫

臣某言伏奉制書褒贈臣亡父冠臣某官尚書左僕射

者時逢霈澤禮極徽章臣某中謝臣家受國恩至臣累

葉常懼不克負荷以忝前人豈意多幸遭逢獲居台輔

集作 高位陛下應乾御極作解庇人恩浹寰區禮崇集作宗

廟垂仁布德自葉流根紫書忽輝黃壤多幸八字集作紫書忽降

於重霄密印榮加於厚 夜星霜增感蒸嘗有輝 非臣墮越所能上報

代兵部崔相公謝追贈三代表 錢珣

臣某言伏奉某月某日制命追贈臣亡曾祖某贈某官
亡祖某贈某官亡父某贈某官伏以恩深逝水澤及重

泉哀極失圖感惟增懼伏念先臣實封聖代寵被乘軒
之數名傳汗簡之書而隙駟難留隴樹斯拱積感既深
於霜露叨榮復忝於陶甄陛下重顧台臣爰加贈典陰
陽未序寧施報國之功霈澤遽臨空激承家之志仰惟
追命唯自省躬臣某無任荷聖感恩哀榮懼一作懼屏
營之至

同前

臣某言伏奉今月某日制書追封

一作贈

臣亡曾祖母亡

祖母亡母某國夫人者典常重舉滢澤下流臣某中謝
伏以尊號皇帝陛下動法天經用宏王道繼降追榮之
命若酬輔政之功竊念微臣謬持魁柄計月日則四時
來疑作未半調陰陽則六氣未知疑作和而聖造曲臨彛章
俯及上公端揆已承褒飾之恩大國贈封更荷顯揚之
賜康化權而無力顧家諒而有光祇戴睿慈臣某無任
哀感激懼屏營之至

為宗舍人謝賻贈表

陳子昂

草土臣某頓首稽顙言今日日中使某官

集作至

奉宣勅

旨以臣母喪贈物若干以給凶事孤臣鞠凶禮辱天贈

集作既

稽顙拜命號絕迷圖臣某中謝孤臣不天早失覆

集作父

蔭兄弟孤藐並未成人亡母哀惇鞠育見保不墜

于地以及於茲煢煢私門幽顯為慶榮泰

集作忝

之望非

有始圖陛下親親敦念未屬憫臣單賤惠降恩休孤門

集作再載

昌寶始天造母子之賴以喜以惶兢兢孤人未

知攸答陛下又恢大運崇號寵章特復私臣弟兄超登

顯位母子光寵榮養以申集作全豈臣單微官能及此早

誓

集作逝

先沒以為親榮而天不禍臣延及先母

集作延于老母

號訴集作愬

無及荼毒煩寃陛下降哀又見憫悼惠賜禮

物過越典章生榮死哀重疊若此孤臣殘喘胡顏日月

集作冒德

而臣之迷塞荒謬禮經先遠之期又勞聖問有無

之禮憂若家人天實為之臣復何及即此殞絕期以謝

恩號慟

集作北

崩推

一作哽

伏表迷塞不勝荒迫之至

初七謝恩表

草土臣某頓首稽顙言今日日伏奉恩勅以臣亡母初

七特降上宮若干人給事黃門若干人并賜物若干段

以給設

一作獲

齊事天命

集作思

過禮伏命

集作念

號惶以臣

凶殃

集作孤臣殃蒙

尚未殞滅荼毒如昨奄將一旬崩號無及

肝心靡

集作靡

潰陛下慈惻哀念孤窮復憂齊祭恐有闕

禮既賜束帛又降上宮恩慈再三若猶未足自國家寵

貴不

集作未

聞此榮草茅孤臣何以堪處不日銷滅永負

聖恩泣血號天

集作號泣旻天

以崩以愬不勝荒迫之至

遷祔謝恩表

草土臣某頓首稽顙言伏奉某月日恩勅以臣亡母遷
祔特降勅給人夫若干車牛及服用物若干以護送靈
柩至京祇奉恩私頓首崩殞臣未亡滅假息苦廬日月
求往奄及先遠荒迷在疚不知禮儀陛下哀矜憫其不
逮恐有顛沛憂及亡靈備物象設並自天錫集作賜祖載

營集作營送又遣集作悉官供威儀不遺集作在途魂魄光寵行

路延竚而以為榮孤臣窮凶何圖至此盛集作天德彌厚

殘喘待終泣血扶靈方滅歸路號感恩造窮絕迷圖不
勝號噓戀恩殞絕

為義興公求拜掃表

陳子昂

臣禍釁所鍾早日孤露墳塋莫掃松柏凋荒臣之不天

實有由

集作
攸

咎死罪死罪昔先臣下代遺訓未亡

集作
忘

而殃罰不圖家禍漸邁

集作
潛構

兄弟無故並為參商中藉

之言所不可道孤臣不孝萬死餘責死罪死罪然臣之
負譴實陷無辜吏議不明以投魑魅自泣血去國守命

南荒歷年被病再以生死炎山漲海氣瘴窮天戴白之

老俗無間者孤臣疲荼豈望須臾分謂委骨滄

集作窮

溟

餌身魚鱉狼荒之鬼永悲長逝不意慶雲垂澤天渙橫

流

集作宏流

拂拭露霜

集作霧露

生見白日踴躍昭泰情何以堪

集作勝

死罪死罪而餘殃未泯凶故仍

集作荐

臻亡兄濟江

合家淪溺嫂姪俱沒一不生存尋途未中臣妻又殞重

疊亡歿契闊山川至止之日生意盡矣誓將守死陵墓

歿齒家園不圖恩幸曲成寵章仍及題輿別駕職是恩

州再造生涯天實為德死罪死罪臣自歸日淺瑩廟未
修荆棘荒然祭祀無主今則便祇王命遠職邊夷歲月
方賒拜掃何日瞻言出涕感咽崩摧伏惟陛下仁養群
生孝理天下萬物感遂各得其宜臣獨向隅有以長戚
伏願天慈愷悌憐憫孤窮寬以簡書之刑賜其告歸之
請使其駿奔西土長號北陵獲申存歿之悲生謁園塋
之樹稽顙松闕謝不睦之辜肉袒山門祈自新之路誓
刻肌骨奉以周旋然後退死蠻夷沉骸糞土甘心朽滅

庶無遺恨儻昊

集作上

天鑒照孤誠可哀則臣之鰥生志

畢今日不勝崩迫之至

為義興公陳請終喪第二表

草土臣某言去年某月日奉哀陳請乞終喪制今某月日奏事官賈臣所奏表迴伏讀報詔不勝悲懼陛下為臣累有政能特見任用使臣移孝為忠即斷來表臣內愧不孝外慙無能污辱聖聰措身無地臣某中謝臣聞時方媮薄勸人以孝時方趨競勸人有禮有不至者誅

而教之臣今不病固合辭避况臣疾發日久亡母未葬
忍偷餘生望畢家事敢汙人倫以傷風俗昔山濤與時
主有舊温嶠亦功存當代濤起應禮嶠不歸葬守禮法
者議而薄之臣於國家無濤嶠之功舊必依詔命兼濤
嶠之可薄俛仰人間豈獨羞耻聖朝用法合置誅殛前
者直省賫勅勒臣赴任使司准勅移責州縣所由官吏
畏懼威嚴臣所經行停留不得待臣出界然後奏報臣
氣力羸憊奔波道路悲憂惶恐舊疾加極半身不遂手

節拘急行步飲食湏人扶助近又兩目昏暗如有瘴冒
雖生猶死不堪力強特望聖慈乞臣骸骨歸奉几筵及
葬州里在臣私情死生願足臣今病在桂州俯伏待命
臣風昏謬妄舉動失常頻犯天威不勝震恐謹遣某官
奉表陳乞以聞

第三表

草土臣某言臣先患風疹并兩目昏闇右手不能制物
一足不自運動前後頻有表狀請停官職臣自到桂州

病轉增劇更加瘴瘧臥在床枕兩目漸不見物起動皆
須扶引死在朝夕敢偷祿位伏恐陛下謂臣尚顧禮教
以疾辭讓遷延歲月待畢喪紀臣除官已來向欲闕歲
頻違詔命合正典刑陛下縱不忍罪臣闕乞臣餘生
固不可闕臣曠官闕臣痛損特望天恩即為臣替不任
荒懼哀懇之至

為田僕射薨謝制使問表 于 邵

臣某言左金吾將軍吳湊至奉聖旨兼賜臣母趙國太

夫人臣嫂夫人并臣及將士等勅書以臣亡兄某特承
憫問捧對哀咽摧裂肝心臣某中謝臣兄報恩未畢抱
恨黃泉陛下俯聽鼓聲永悲簪履哀痛之詔並歸一門
撫存之恩將宥十世載悲載躍感戴無階以亡兄既忝
信臣寡嫂則惟近屬偏承恤慰曲被恩慈義同家人禮
絕朝典喻臣老母保養高年念臣諸孤俾全餘喘無大
無小上煩聖慈寵光親降於重臣優問必先於宿將殞
身難報拜手增悲臣無任荷恩哽咽之至

為田神玉謝賜錢供兄葬事表 韓翊

臣神玉言伏奉手詔兼奉勅牒賜錢五千貫文給臣亡
兄神功葬事用拜手感恩闔門悲戴臣某中謝臣兄始
終効節存歿銜恩智悼在堂已加朝禮滕公居室又荷
天慈錫其九府之錢寵以重泉之路多踰千萬榮冠一
時去病飾終空陳玄甲孔光送往薄賜黃金在臣私門
寵極前古但盡哀號之禮寧憂窀穸之儀臣無任感戴
悲躍之至

為田神玉母太夫人謝男神功塋賜錢及神玉

領節度表

前人

妾張氏言奏事官潘洽迴伏奉手詔以妾亡男贈司徒
神功葬日有期特承哀問兼賜神玉手詔所賜本道錢
四萬貫並令妾以下聖慈曲被感戴哀絕妾中謝妾隨
子東征銜恩北闕累承雨露載啓山河同顛之親幸及
貴登僕射異一作非勤之母不見生拜司徒何一作忽荷聖

慈寵加存歿弘

疑作敬

姜年暮俯矜哭子之哀庾翼才微

尚使領凡之衆殊悲望外且慰目前况將通

疑作逼

遠期

特重渥澤更切撫存之義兼廻贈往之資赤仄滿庭紫
泥在篋痛而受賜哀以為榮庶神功有知應感安親之
道竟其無昧更酬報國之誠載號載悲不勝感絕妾無
任悲戴之至

為田神玉謝兄神功於京兆府界擇葬地表

臣神玉言今月三日得上都留後報稱伏奉勅牒臣亡

兄神功宜令所司於京兆府界擇地安葬仍令京兆尹
克監護使勾當恭承渥澤俯及遠期拜手感恩推心增
慟臣其中謝臣亡兄任崇寄重方報聖恩祚薄釁深早
違昭代天慈悼徃朝典飾終日月有時乾坤曲施榮加
昭葬寵荷官給榮如曹氏京兆開阡貴比霍家初連象
冢義光前古禮極哀榮在臣一門盡出望外載悲載躍
無階上酬臣願號赴私門親護喪事緣總留務不敢自
專今見催促行裝伏待進止

為田神玉論疑不許赴上都護喪表

臣某言奏事官潘洽迴伏奉勅書手詔兼宣進旨不許
臣輒離所部又以臣脚弱無力伏奉批表以軍府政殷
藉卿鎮緝不赴上都也懇誠莫遂祇命哀惶臣某中謝
臣兄永辭昭代俯及葬期臣請解戎章歸護喪事義雖
聞上恩不聽卑掩泣轅門飛魂隴樹外慙形影內切肝
腸千兩送車臣空瞻望九原臨穴臣不躬親一叫骨驚
三時心死伏以大君有命重鎮無人俾臣割哀勗臣留

務宣恩拜手祇事撫膺又荷聖慈追懷前効俯悲簪屨
軫念松楸更使改期貴先遠日幽明銜荷感謝無階不
任哀感之極

此篇元誤編在六百二十五卷雜諫門今移于此
為田神玉謝詔葬兄神功畢表

臣某言臣亡兄某以今月二十日詔葬永畢感恩追慟
肝心如裂臣某中謝臣亡兄俯歸幽窆更軫皇慈易以
大名賜夫祕噐王人加贈京兆護喪道備哀榮念深勲

舊霍光故事斯則為優

一作方斯為優

謝安殊禮彼何足貴臣

限總留務虔恭聖私不及親扣泉扃盡哀號之義迴趨
陛下謝褒寵之恩慟哭轅門五情分潰臣無任感激之
至



文苑英華卷五百九十七

欽定四庫全書

集部

文苑英華卷

五百九十八至
六百

詳校官給事中_臣李臺

助教_臣常循覆勘

總校官進士_臣朱鈞

校對官中書_臣胡紹基

謄錄監生_臣張元功

欽定四庫全書

文苑英華卷五百九十八

宋 李昉等 編

謝詔勅書慰問

此卷英華所編失
并代先後今正之

為留守羣官謝恩詔表一首

謝勅書表一首

為留守少傅等謝勅書慰勞表一首

謝問表一首

謝恩慰喻表二首

代河南裴尹謝墨勅賜衣物表一首

謝詔許濠泗州割屬淮南表一首

謝手詔慰撫表一首

謝恩存問表一首
謝墨詔表二首

謝手詔表三首
謝潘侍郎到宣慰表一首

謝恩宣慰并賜手詔表一首

謝手詔許受吐蕃信物表一首

謝勅書宣慰表一首

謝判官郭彥郎中謝手詔表一首

代謝賜批答表一首

為留守羣官謝恩詔表

顏師古

臣某等言守太常少卿崔敦禮至京師俯降神筆曲垂
誨獎祇奉欣戴伏深抃躍臣等詳觀史策歷選前王損
益相承質文遞變遺風餘烈昭然可觀自堯舜之後殷
周已降政道踳雜淳風斯寢干戈日用喪亂宏多悠悠
千載莫能澄廓况乎有隋失德區宇分離九鼎鳧飛八
紘魚爛圓首方足俱委骸於原野蹠實排虛同取斃於

凶毒亂極則治命實有歸河清啓期天祚攸底陛下獨
運神武援手濡足陶甄庶類屈已忘勞日月之所照臨
天地之所覆載皆受更生之賜俱荷裁成之力加以留
情庶政昧旦丕顯掃滌煩苛澄清禮樂遠邁開闢之功
牢籠帝王之表時和歲稔玉燭遐被嘉祉靈貺金英自
臻朱明炎暑聊因多暇整廵鸞踪巡幸甘泉伏承攝衛
攸宜聖躬萬福下情慶幸率土咸賴臣等材質庸陋謬
荷超擢俯循薄劣懼不克堪謹當夙夜戰兢自相勗勵

竭心罄力以酬鴻造使百僚率職仰副天心四方祇勉
俱稱慈澤臣無任

謝勅書表

許敬宗

臣某言奉今月十一日勅伏開瑤檢等鑿竅而覩虹霓
戴荷絲言似假翼而騰雲漢臣以愚劣本乏詞情比如
衰老更增才盡年踰郭北滯守周南引領天庭望丹霄
而結戀馳魂闕懼黃落而長違忽預聞韶方申擊壤
之慰詞均鄭璞匪無遼豕之慙精衛銜芻豈究靈鼈之

境秋螢繼日安測陽羽之昇天澤旁濡恩光曲照剪拂
錫其容彩吹噓飾其羽毛雕朽為妍竊比鏗一作金之
響涸鱗霑潤縱游陸海之深不勝抃躍之至謹附右崇
衛副率賀拔儼奉表陳謝以聞謹言

為劉少傅等謝勅書慰勞表 楊炯

臣某等言司馬郎中王知敬至伏奉今日日手詔璿璣
下照觀天象之三光玉檢前開見河洛之八卦發揮珪
璧感召風雲不知手之舞之足之蹈之者也臣等稽之

天地名山闢長男之宮步之日星樂府奏重光之典

疑作

曲二王所以立教者天子為先萬國所以稱貞者元良

是寄伏惟天皇御中道踐平陸對揚文武之休命紹伏

古先

一作先王

之大業洛京朝市義叶於省方秦地山河事

資於監守皇太子一物三善四方繼明孝以承親顯於

直地之路明以照下驗於長壽之術虔奉綵綸躬親政

事德刑詳矣既遠安而邇肅博愛先之亦途歌而里詠

固以禮成恭敬道洽溫文知寶歷之無疆信蒼生之幸

甚臣等竊循愚蔽謬荷恩私或位聯輔弼職在台衡希
少陽之末光自韜螢火洽重海之餘潤色疑息牛涔不
謂殊獎曲覃真文俯及載之眉首奉以周旋聽葛天氏
之歌方慙此慶聞有虞氏之石未均斯喜但知懷璧之
罪不可越鄉豈敢貪天之功以為己力傾誠每積候朱
鳥於南宮拜德無因限蒼龍於左闕臣無任

謝問表

張說

臣說言內給事高力士至伏奉墨制

集作勅

聖慈綢繆言

及舊昔拜舞捧讀且驚且喜

集作且喜且慙

臣聞漢主眷駢來

之臣魏君憶同遊之客誠以故舊不棄而光陰易往今
之聖情實過於昔臣曩蒙侍文北閣倍宴東堂庭闕一
逢寒暄二載不意逢春之草承清集作湛露之惠溼容光
之隙引遲日之暉華無任荷恩戀主之至謹附高力士
奉表陳謝以聞

謝恩慰喻表

李邕

臣某言伏奉今年某月日恩旨恕臣重責護臣小才日

月之明早曜絲髮雷雨之施振起昆蟲臣某中謝臣二十餘年數從遠謫流離辛苦契闊死生因陛下興聖謀行天討救萬人之命解四海之懸臣所以脫於往危保於今泰者為此頃歲昌宗執柄三思弄權臣與宋璟同論桓敬俱奏貶臣為常

李邕傳作富

州司戶實荷陛下誅韋

氏之後收正人之餘特拜臣左臺侍御史此陛下活臣之命貸臣之榮一也頃歲譙王重福謀立東都臣當留臺與洛州司戶

日知傳作馬

崔日知挫其逆形收其餘孽東

都底定知臣之功自文林郎拜朝散大夫除戶部員外郎岑曦崔湜之輩以臣再用往還并忌崔隱甫倪若水等恐為陛下之助與臣同制各貶官仍聯翩左遷為崖州舍城縣丞及陛下正位紫宸臣又自嶺南九品遠惡官除朝散大夫戶部郎中又荷陛下活臣之命貸臣之榮二也頃歲陛下東封將還臣路左謁見猥承聖顧廣錄舊文朝議恐陛下用臣薛自勤與外生庫狄履溫羅織臣至死仍承陛下免其罪授臣官又荷陛下活臣之

命貸臣之榮三也臣出入嶺南自經一紀自澧州司馬加朝散大夫兼此州牧解青綬垂彤襜去瘴毒之艱遂江山之性又荷陛下活臣之命貸臣之榮四也且臣遠覽前書頗聞故事一食之惠尚可殺身況臣蒙聖主千年之恩救愚臣萬死之急至若訓誨委積率喻再三蚊力負山不勝其重螢火向日徒失其晶必當閉戶絕交澄心去欲下以安所部上以報所天豈徒殞軀喪元焚妻夷族而已無任生死肉骨恐懼感戴之至

同前

崔沔

臣某言伏奉某月日勅書慰問跪捧抃躍不勝感戴臣
某中謝臣東鄙孤賤名節未立比州述職績用無聞誠
愧王尊傾河羨溢德慙呂望恒雨霖靈加以擅散國儲
輒違常憲權稽兵賦不會嚴程雖事切憂人而跡冒乎
法鞠躬夕惕側足屏營伏待刑書豈期恩命陛下明逾
日月施重丘山察求瘼之心弛慢公之責紫泥加命降
自雲霄玄澤殊私旁霑草木振窮之際散發廩之深憊

拯溺之辰矜泛舟之小惠恤下諸吏咸知向方徒殺征夫卒獲寧止猥承天造安敢名言徒誓微軀何能答効臣某限以守職不獲蹈舞闕庭無任

代河南裴尹謝墨勅賜衣物表

臣某言今日日進甕器官某郎行河南尹鞏縣主簿將清還伏奉墨制仍賜臣衣一副瑞錦一端恩垂北闕榮照東園捧戴殊私載兢載惕臣某中謝伏惟開元天寶聖文神武應道皇帝陛下兼上聖之姿運大明之照雨

露萬國陶甄百靈履無為而撫域中躬自然而化天下
猶復勤勞睿念祇奉宗祧以億兆為心慈儉為寶臣曲
延休盼叨據天官上報無階致身惟谷任土修貢臣子
率由之禮自天降祐君父非常之恩宸翰昭回聖慈稠
疊寧期水土之淺上簡乾坤之心天下幸甚復淳風於
大古小儉德於前王特垂懸象之明俯賜名臣之服恩
銘骨髓澤被宗門不勝慶幸且重錦之賜取貴春秋解
衣之賞見高漢代服以宮中之製耀其機上之文潢潦

獻微邱山報重又臣所進新米特奉手詔更聞豐歲知
萬國之至和式潔秋嘗明一人之孝理無任手足蹈舞
之至

謝詔許濠泗兩州割屬淮南表

代相
公

劉禹錫

臣某言伏奉十一月二十九日詔書其濠泗兩州令依
前收管臣謬承寵光作鎮淮海位均九伯權揔十連內
省無堪常恐不逮豈謂恩私曲被封略有加慙無報政

之勤重受分憂之寄伏以兵戎方息閭里未安謹當奉
宣皇風慰彼黔首且責成於牧宰期不失於澄清伏惟
聖明俯賜照集作胎鑒臣無任

謝手詔慰撫表

臣某言臣監軍使判官劉寄至伏奉勅書手詔兼奉宣
口勅奏事官王穆廻又奉尺書手詔兼宣口勅并慰撫
問臣及將士等聖慈稠疊感戴無階臣某中謝臣跡忝
總戎力慙致果一昨勵兵秣馬破賊攻城皆承睿略指

一作發

蹤廟謀制勝豈臣庸妄敢竊勲勞每佳馮異推功
見稱良史常惡樂羊求賞讎謝謗書拳拳血誠天實諒
只但以孤根獨立衆口易誣銷骨為虞撫心是懼樹楊
恐拔非獨一人採葛畏讒信如三月忘寢與食以榮為
憂陛下聖聰聽卑宸鑒燭遠天書軫念口詔宣慈特荷
知臣之明累矜報主之効許之純直慰以貞堅北闕之
恩謬加倚賴東門之倚又切防虞寵兼腹心澤浸骨髓
載欣載躍感戴無階豈惟剪逆梟兇獨申微効實冀粉

身灰骨上答殊私臣無任

謝恩存問表

臣某言王敬仁至奉口勅存問微臣憫其踈遠之悲慰其違離之思臣某中謝臣自今春分司入洛即屬陛下受命承天企揖讓之盛儀隔肅雍之大禮玄英匝歲日夜懷歸白雲在天闕庭難見豈期廷瓌為寶尚憶他山之石貞明溥臨遠及容光之地仁深行葦眷甚遺簪草木之誠何酬造化無任感恩慕戀之至

謝墨詔表

臣某言中使陳日華至奉宣聖旨存問兼賜臣墨詔又以臣所奏羅瑤及裴靖政理有方今各賜手詔激賞者恩降重霄澤流下土義敦獎勸榮冠等夷臣某中謝臣昨以羅珣裴靖勵精吏理効用著明人感悅安俗致殷阜恐湏甄錄以勸在官輒獻封章具陳成績伏蒙睿覽集作慈俯亮愚衷嘉治行之尤光示絲綸之深旨守道者益以固志懷慝者由是悛心激俗化人於慈為大臣謬

司廉察職在澄清幸遇旌善之時獲免蔽賢之責

二

臣某言中使陳日華至奉宣聖旨慰勞臣及將佐官吏
僧道耆壽百姓等兼賜臣墨詔恩降紫泥澤流下土跪
捧自天之命遙傾捧日之心臣某中謝伏以皇帝陛下
凝旒穆清軫念黎獻已洽雍熙之化尚存宵旰之勤遠
降王人特紆宸翰慰問集作安稠疊曉諭便蕃任重力微
不知上答應緣戎旅庶務謹具別狀奏聞伏乞皇明俯

賜照鑒無任

謝手詔表

詔後批云
朕自書

臣某言中使閻忠信至奉宣聖旨存問兼賜臣手詔拜捧紫泥跪伸金簡承旨見聖神之略感恩知身命之輕臣某中謝臣素乏異能幸逢昌運猥當旄鉞之寄未靖妖氛榮分台鼎之名何階啓沃竊位斯久速尤是虞豈謂玄化曲成鴻私荐及特紆睿思英華作
異思非親灑仙毫降自九天粲然五色初喜麗天之象遠燭輝光旋驚垂露

之蹤曲罩霈澤鸞鶴迴

集作鸞
鳳齊

翔而變態煙雲舒卷以

呈姿賦彩飛空聳神蕩目恭惟國寶何幸家藏感極涕
零莫知上答應緣軍旅庶務謹具別狀奏聞無任屏營
之至

同前

待載

臣某言今日日中使郭忠政至伏奉手詔以臣微疾尚
軫聖懷日月私臨於幽

一作陰

蟲雨露曲霑於旱草感戴

所迫若無精魂臣某中謝臣初中風疾狀候頗劇自蒙

聖澤特賜神方酌和劑之宜備甘辛之味曾不信宿已覺痊平伏以聖意纏綿此方神異思慮超古今之表重輕得損益之中故以藥攻病如水灌火且以鴻恩為湯餌何榮衛之不調以造化為岐和何膏肓之不去丘山至重草芥極微報恩之分殺身後已不勝激切危懇之至謹奉表陳謝以聞

二

臣某言中使某至伏蒙詔旨褒臣政事慰臣疾病并示

除改廬州刺史路應等五色絲綸九霄雨露光華潤澤
併集微臣捧戴兢惶無地容指臣某中謝臣伏見自淮
而南天下重鎮臣叨受旄鉞僅二十年人無天昏歲屬
豐稔瞻彼疆域小有康寧此皆陛下睿謀鴻化之所被
及豈臣薄劣自能致理臣所患風疾自然降損飯食甘
適肢體便安此皆陛下神方秘術之所攻療非臣調護
所能平愈伏見除改諸州刺史等路應和而明裴靖才
而通羅珣斷而達李正臣強而毅陛下或以賞受或以

能遷或增之以憲司或擢之以棘寺實所謂宸鑒高遠
睿獎宏深雖虞舜官人之美無以過此臣才非申甫思
重嵩華惟跼地以彷徨敢窺天之遠近不勝懇切悽悽
之至謹奉表陳謝以聞

謝潘侍郎到宣慰表

楊於陵

臣伏奉八月二十四日勅陛下以江淮旱歉軫慮蒸黎
命度支鹽鐵轉運使戶部侍郎兼御史中丞潘孟陽宣
諭慰安蠲除疾苦以今月二十九日到臣本州頒賜詔

書以示恩化臣及官吏百姓等咸蒙聖慈特加存問爰
自城邑達於里閭喜氣浮川歡聲被野臣忝守藩服恭
承德音荷戴寵光跼蹐無地中謝臣聞天覆無私雖幽
必燭人心有係惟聖能通伏惟皇帝陛下德冠君臨澤
均子愛一物失所如軫於納隍一人不獲載懷於馭朽
敷求至理懋建太和明命施行率土欣戴臣實庸瑣叨
領方隅奉陛下亭育之仁當海濱旱歉之後人多遷徙
賦亦通縣夙夜憂兢冰炭交戰忽承慈旨特降使臣優

貸俯及於藩條勤恤遍加於凋瘵以制國用思致於均
平以最庶官俾甄其課効發號而生靈交暢先春而和
氣導迎宇雖廣而煦嫗必周天雖高而感通一作寧遠

臣幸逢昌運荐沐殊私誓將罄竭駑駘上裨萬一無任
激勵踴躍感恩之至謹遣討擊副使曹序奉表陳謝以
聞

謝恩宣慰并賜手詔表

臣某言押領日本國朝貢使迴伏奉宣聖旨并賜臣手

詔寵私累降荷戴難勝臣其中謝伏惟皇帝陛下重光
嗣聖立德升聞九有來王萬方率職以日本國使遠獻
琛贄畢事旋歸言念梯航之勞厚其行李之費恭承詔
旨伏見天慈臣當道發遣素有舊例今則稍加豐備上
副懷柔已具別狀分析聞奏臣無任

謝手詔許受吐蕃信物表

臣某言奏事官戴誠迴伏奉墨勅慰問臣并以臣所進
助山陵材木收納訖及吐蕃東道都元帥尚乞悉羅與

臣及邵崇政等信物並蒙聖慈許令收領者殊私累降感抃難勝臣某中謝臣以庸鈍叨膺任寄憑奉聖略藩守疆陲而亭障無虞戎夷獻款每示綏懷之德願輸臣妾之心昆夷喜附於漢疆禮物遺通於邊將陛下以覆載之廣延納是宏假其專受之名外示不疑之禮仰承宏貸俯積兢慙今臣及邵崇政所與迴答信物并準詔據舊例量事發遣訖其敬國清已牒本鎮令勘待報到續具文奏又蒙宸慈特賜答蕃書本宣威示信體遠懷

人俾無飾詐之虞實感曲成之道誓當戮力以俟一時
永絕虛名乃臣職分無任感荷屏營之至

謝勅書宣慰表

臣某言中使馮仙鶴至伏奉手詔兼宣口勅慰撫臣及
將士等聖恩曲被戴荷無階臣某中謝臣謬承驅策盪
滅兇殘役未踰時恩無曠日九天之上詔下斯須千里
而遙威如咫尺示臣攻守之勢勗臣進取之期斷敵用
竒皆憑睿略指縱制勝盡出宸衷但當戮力悉心捐軀

致命冀申微効仰答鴻私臣無任

為判官郭彥郎中謝手詔表

臣某言監軍使判官馬某至伏奉勅書奉宣口勅慰撫臣及將士等恩獎殊常寵驚無地臣某中謝臣幸承朝命切佐戎旃無借筋之謀詎申微効有挈瓶之智備守成規戮力彼軍悉心留務雖事皆關白旌旆非遙而職在防虞城池是切豈謂常憂罪戾忽降綸言每驚寵辱特荷恩私聖澤載覃不遺於細物天書忽降曲賜於賤

臣手捧紫泥心馳丹闕以欣以抃戴荷無階上答殊恩
百生多幸俯慙微命萬死難酬臣無任

代裴相公謝賜批荅表

杜牧

臣某言臣伏奉今日日批荅令臣宜斷來表不許牢讓
者仰承鴻澤跪捧芝緘戰越失圖啓處無地臣某誠惶
誠恐頓首頓首臣昨奉制集作書付以魁柄自顧斗筭

之器樸樵之才乘恩寵時竊棟梁任只合効蔡謨堅卧
孔霸懇辭尚猶拜謝天顏進見卿士榮忝既積憂慙集作

惶

實深是以拜章上陳懇詞自叙冀迴聖鑒更擇時賢

豈意睿旨重臨綸言再下不令徇志且遣守官大君之

成命已行微臣之丹懇不遂誓當戮力盡瘁粉骨捐軀

知無不為有

集作見

死不避冀答君親生成之德用酬乾

坤覆載

集作育

之恩無任感激血誠慙惶戰越之至謹奉

陳謝以聞

文苑英華卷五百九十八